



UKA 2015/125.1
21. oktober 2015
Ane Hansen

Uunga siunnersuut: Qimminik qimuttunik kiisalu qimmeqarneq qitsuuteqarnerlu pillugit Inatsisartut inatsisaat nutaaq.

(Aalisarnermut, Piniarnermut Nunalerinermullu Naalakkersuisoq)

Qimmit qimuttut kalaallit issittormiuusugut immikkuullarissumik kulturitsinnut ilisarnaatitta ilagilluinnarpaat. Kalaallit qimmiat qimuttoq nunani issittumi maanna kisiartanngorpoq ukiuni tuusindtilikkaani qimmeqatigiinnik allanik akuneqanngilluinnarluni maannamut uumasuutigineqarsinnaasimasoq. Ukiuni tuusindtilikkaani qimminik qimuttumik illersuisinnaasimanitta takutippaa kulturikkut ileqqunik eriagisarialinnik ataatsimoorussilluta mianersuussilluta illersuinerput maannamut kinguneqarluarteq.

Ukiunili kingullerni silaannap kissatsikkiartornera pissutiginnarnagu aammali qimmit qimuttut piniutitut atortorissaarutunik muteerniusunik unammillerneqalernerisa kingunerisaanik qimmit qimuttut sukkasuumik atorfissaarukkiartorneqarput. Tamatuma kingunera takussutissaqarpoq, tassami ukiuni kingullerni kalaallit qimmianik qimuttunik qimmiutillit sukkasuumik ikiliartormata.

Taamaammat tupinnangitsumik avannaani kalaallit qimmeqarfiusumi qimmiutillit kissaatigisarpaat kalaallit qimmii qimuttut pillugit immikkuullarissumik inatsisiliortoqartariaqartoq. Tamannalu kissaat uani inatsisip nutarterneqarnerani Naalakkersuisoqatigiinnit malinniarneqanngilaq, tamannalu ajuusaarnartutut Inuit Ataqatigiinnit isigaarput. Piffissarlu manna iluatsillugu partiinut tamanut kaammattuutigissuarput eqqarsaatigeqqeqqullugulu kalaallit qimmiat qimuttoq pillugu immikkuullarissumik inatsisiliortoqarnissaa ataatsimoorullugu Naalakkersuisunut kaammattuutigissagipput.

Inatsimmi uani nutarterniarneqartut arlaliupput ilaatigut inatsimmi oqaasertat ullutsinnut naleqqussarnissaat siunertaalluni, aaliangersakkat ersarinnerulernissaat siunertaalluni aammali qimminik pitutaanngitsunik toqutsisariaqarnermi aningaasartuutunik akiliuteqartitsisoqalernissaa periarfissinneqarluni.

Siunersuummi allannguutissanut ilaavoq qimmit piaqqat tunniunneqaratillu tuniniarneqartassanngitsut qaammatinik arfinilinnik utoqqaassuseqalersimanngippata, siunnersuut taanna kalaallit kulturitoqaannut kalluaassaaq, tassami ingammik avannaani piniartoqarfiusumi ingammik nukappiaqqat inunngoraangamik qimmiaaratissaminnik tunineqartarput amerlisagassaanik inersimasunngorunillu piniarnermi atugassaanik. Ileqqut tamakkua immikkuullarissumik kinaassuseqarnitsinnut pingaarutilittut sulii isigisavut kalluarneqassapput imaasiillaannarlugit isumaqatigiuminaatsut Europamiullu kulturiani ileqqunut eqqaanarnerusinnaasut.

Tassa tamakkuupput ilaatigut kalaallit kinaassutsitsinnut nunamilu issittorsuusinnaasumi najugaqartutut immikkuullarissusivut uani inatsimmi ersigunnaarsinniarnaqartut, qimminut qitsunnullu nunani allaniit eqqussukkanut naligalugit inatsisiliunneqarniarmata. Tamanna Inuit Ataqatigiinnit akueriuminaatsipparput.

Inatsisiliaq una qimminut takornartanut qitsunnullu naleqqunnerusutut oqaatigineqarsinnaavoq naak qimmit qimuttut aamma pineqarluartut.

Taamatut oqaaseqarluta inatsimmi allannguutissatut siunnersuutit Inatsisartut Aalisarnermut Piniarnermut Nunalerinermullu ataatsimiisitaliani aappassaaneerpeqartinnani nalilersorluar-
neqassasoq.